



Claude WISELER
President vun der
Chamber vun den Deputéierten
19, um Krautmaat
L-1728 Lëtzebuerg

Lëtzebuerg, den 02/10/2025

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministère fir Sport & Verdeedegung weiderzeleeden.

Et ass begréissenswäert, dass de Staat eis lëtzebuerger Elittesportlerinnen an Elittesportler mat den adequate Mëttel ënnerstëtzt. Sie verrieden net nëmmen eist Land am Ausland, mee sinn och Virbiller fir eis Jugend. Nieft dem entsprechemdem Recht op Congé sportif gesäit den Artikel 14 vum ofgeännerte Sportsgesetz vun 2005 8 weider Moossname fir, déi d'Elittesportler:innen ënnerstëtze sollen. Laut Artikel 13 aus dem selwechte Gesetz viséiert den Term Elittesportler déi Athlet:innen, deenen hier sportlech Qualifikatioun esou vum COSL oder vum LPC unerkant ass. Laut Artikel 74 vum Arméisgesetz muss Kandidat:innen, déi de Fräiwëllegendéngscht bei der Arméi als Elittesportler:innen well untrieden, och d'Krittäre vum Artikel 13 vum Sportsgesetz erfëllen. D'Decisioun, fir als Elittesportler:in an de Fräiwëllegendéngscht bei d'Arméi opgeholl ze ginn, läit bei der Verdeedegungsministesch, op Rot vum Sportminister, dem COSL an dem jeeweilege Verband.

An deem Zesummenhang wëllt ech de Ministeren dës Froe stellen:

1. Am Kader vun der leschter Ofännerung vum Sportsgesetz ass zwar vill iwwert Definitioun vum Begrëff Elittesportler diskutéiert ginn, schlussendlech ass et allerdéngs bei der ursprüngelecher Versioun aus dem Joer 2005 bliwwen. An sengem Avis zu der deemoleger Gesetzesvirlag huet de Staatsrot bemierkt, dass dës Definitioun no senger Begrëffer ze vague wier an et zu Kontestatiounen komme kéint. Och gëtt et hei eng Diskrepanz tëscht Individualsport an Ekippesport.
 - Wéini ass een Ekippesportler Elittesportler?
 - Ass de Sportminister an enger nächster Ofännerung vum Sportsgesetz gewëllt, an Ofsprooch mam COSL an mam LPC, d'Definitioun an d'Qualifikatioun vum Begrëff vum Spëtzesportler ze präziséieren, wëssend dass souwuel den COSL wéi och den LPC Sportler:innen an engem



Elittekader genannt hunn? Wann nee, firwat net?

2. Kann de Sportminister een Tableau presentéiere mat den Elittesportler:innen pro Verband, déi aktuell eng vun de 7 Moosnamen aus dem Artikel 14 vum Sportsgesetz a Ussproch huelen?
3. Kënnen d'Ministèren eng Lescht präsentéiere vun alle Sportler:innen, déi aktuell an der Elittesportsektioun vun der Arméi sinn, mat der jeeeweileger Federatioun?
4. Un eis goufe Bedenken erugedroen, dass ëmmer méi jonk Talenter an d'Elittesportsektioun vun der Arméi opgeholl ginn.
 - Natierlech sollen a musse jonk Talenter am Lëtzebuerger Sport weiderhin ënnerstëtzt ginn, mä gesinn d'Ministèren hei net ee Widdersproch mat der Definitioun an der Qualifikatioun vum Begrëff Elittesportler?
 - Misst hei net am Sënn vun der juristescher Sécherheet a vun de Sportler:innen selwer nogebessert ginn an d'Krittäre fir an d'Elittesportsektioun vun der Arméi deementspreechend och ugepasst ginn, esou wéi och d'ALAD dëst säit Januar 2025 gemaach huet an dëst getrennt huet?
5. Wéi gëtt dëst am Kader vum sougenannten „grousse Médico“ gehandhaabt, deen de Staat zu 100% finanzéiert? Ginn do weiderhin d'Elittesportler:innen aus den Elittekadere vun COSL an LPC betreit an och d'Sportler:innen aus der Elittesportsektioun vun der Arméi?
6. Kënnen d'Ministère präziséieren, wéini eng Elittesportler:innen d'Elittesportsektioun vun der Arméi verlosse muss?
 - A wéi engem Zäitraum muss dëst geschéien?
 - Gëtt et hei Ënnerscheeder tëscht Individualsportler an Ekippesportler?
7. Wäer dat och de Fall, wann den Athlet als Profi ee gewëssene Seuil vu Revenu géif iwwertreffen? Wa jo, wéi héich ass dëse Revenu a wou ass dëse Montant festgehalen?
8. Muss ee Sportler aus der Elittesportsektioun austrieden, wann en déi sportlech Zieler am Ausland net areecht huet an erëm zrëck op Lëtzebuerg an ee Veräi kënnt?
 - Wann nee, gesinn d'Ministèren hei net ee Probleem mat der Chancëgläichheet?
 - Wat sinn d'Méiglechkeete fir dës Sportler:innen am Beräich vun der Arméi?
9. Aus evidente Grënn kënne keng Elittesportler:innen vum LPC an d'Elittesportsektioun vun der Arméi opgeholl ginn. Fir dës, an och anerer, déi de Wee an d'Arméi net wëllen ugoen, géif sech dann déi sougenannten zivil Karriär ubidden. Dëst soll laut Aussoe vum Sportminister net a Konkurrenz mat der Elittesportsektioun vun der Arméi sinn.

- Wëssend dass et hei scho säit längerem Iwwerleeungen am Conseil supérieur du Sport gi sinn, wou sinn hei d'Aarbechten drun?
 - Ass virgesinn, dass Elittesportler:innen an dësem Sënn an de geplangten IPESS integréiert ginn als Complément zu der Elittesportsektioun an der Arméi?
10. Laut Aktivitéitsrapport vum Sportsministère sinn am Joer 2024 insgesamt 275.000 € u 27 Athleten aus der Elittesportsektioun vun der Arméi gaangen.
- Aus wat genau bestinn dës Ausgaben a wéi ass dës Ënnerstëtzung opgedeelt?
 - Sinn änlech Ausgaben un aner Elittesportler:innen an Elittesportler gaangen am Sënn och vum Gläichheetsprinzip?
 - Wa jo, kënnen do d'Minister:innen déi néideg Präzisioune ginn an op wéi enger gesetzlecher a reglementarescher Basis dës fundéiert ass?
11. Mam groussherzogleche Reglement vum 18. Juli 2025 iwwert d'Aschreiwungsmodalitéiten fir d'Opnam als fräiwëllegen Zaldot ass säit dem 4. August 2025 dat groussherzoglecht Reglement vum 28. August 1997 iwwert d'Elittesportsektioun an der Arméi ofgeschaaft an domadder dann och déi reglementaresch Basis fir de Staat, fir verschidden Onkäsche vun den Elittesportler:innen an der Arméi ze iwwerhuelen.
- Wéi gedenken d'Minister:innen elo hei virzegoen – op wat fir enger Basis wäerten d'Arméisportler:innen respektiv dann och aner Elittesportler:innen verschidde Käsche vum Staat zrëckbezuelen kréien?
 - Gedenken d'Minister:innen dës, esou wéi d'Verfassung dat virgesäit a gesetzlechen a reglementaresche Kader festzehalen?
 - Kann de Staat ënnert dësem Ëmstänn weider Ausgaben ënnerhuele, wëssend dass eleng fir d'Elittesportler:innen an der Arméi am Budget vum Joer 2025 352.000 € virgesi sinn?

Mat déiwem Respekt,



CLEMENT Sven
Deputéierten

